

27/07/2000

Tiga tebusan Malaysia telefon keluarga dari Jolo

KOTA KINABALU, Rabu - Tiga tebusan rakyat Malaysia yang masih ditahan kumpulan Abu Sayyaf - Kua Yu Long, Basilius Jim dan Fong Yin Ken, menghubungi keluarga masing-masing di Sabah hari ini bagi memberitahu keadaan mereka di Jolo, selatan Filipina.

Bapa saudara Kua, Chow Wai Fang ketika ditemui di Hotel Karamuning di sini hari ini berkata anak saudaranya, Kua menelefon hari ini untuk memberitahu keadaan mereka di Jolo.

"Kua memberitahu mereka berada di kawasan Bandang berhampiran masjid tetapi tidak diberitahu apa tujuan mereka berada di sana. Dengan menggunakan telefon yang dipinjamkan kumpulan Abu Sayyaf mereka bertiga dapat menghubungi keluarga di Sabah, kira-kira jam 9.30 pagi ini.

"Selain Kua, Basilius dan Ken turut menghubungi keluarga masing-masing hari ini untuk bertanya khabar," katanya kepada Berita Harian.

Keluarga Kua dan Basilius dari Semporna dan Kinarut kini berada di ibu negeri untuk menunggu ketibaan baki mangsa tebusan yang sedang dalam proses pembebasan mereka oleh kumpulan terbabit.

Sementara itu, empat mangsa tebusan yang dibebaskan Jumaat lalu, Francis Masangkim, Baln Krishnan Nair, Lee Hock Liong dan Vincent Kong, masih berada di ibu negeri.

Mereka dijangka bertemu Datuk Seri Dr Mahathir Mohamad di Hotel Sutera Harbour malam esok sempena lawatan Perdana Menteri selama tiga hari ke Sabah mulai petang ini.

Mangsa awal dibebaskan, Zulkarnain Hashim dan Abdul Jawah Salawat yang kini berada Tawau dan Semporna pula dijangka tiba di ibu negeri esok untuk bersama menghadiri majlis makan malam Perdana Menteri bersama rakyat.

Francis yang ditemui Berita Harian di tempat penginapan mereka sibuk berbincang dengan rakan lain, Lee dan Vincent mengenai pakaian batik yang diperlukan bagi menghadiri majlis makan malam esok.

"Kami mana ada baju batik tetapi pegawai Bahagian Keselamatan Negara (BKN) yang ditemui berjanji mendapatkannya. Malu juga kalau majlis rasmi bersama Perdana Menteri yang hanya sekali seumur hidup tidak berpakaian sesuai," katanya.

Vincent pula berkata, mereka sekarang agak sukar untuk berjalan keluar terutama untuk membeli barangan di pusat beli-belah kerana orang mudah mengenali mereka.

(END)